

Bin Playa riba Dia di Betico

Museo y galerianan ta habri pa publico disfruta

FORMA bo mes un grupo di famia y amigonan y bin pasa un dia yen di ambiente na Oranjestad diaranson, dia 25 di januari. Riba Dia di Betico 2012 Museo, galeria y instituto ta habri nan porta entre 10'or di mainta pa 2'or di merdia pa grandi y chikito por disfruta di e historia, cultura y expresionnan di arte cu Aruba ta asina rico den dje. E exito di Dia di Betico 2011, unda e dos museo na Playa y Stichting Rancho a uni pa atrae publico na playa cu e meta pa trece historia y cultura di Aruba mas cerca di su hendenan, tabata un empuhe grandi pa e aña

aki mas galeria y institucionnan uni pa brinda oportunidad na un y tur pa descubri y aprecia arte, historia y mas herencia di nos pais.

Na Weststraat z/n Stichting Rancho lo habri e exposicion "Rancho" cu un 'soft-opening'. Dedicada specialmente en memoria di defunto Sr. Sint Jago lo expone boto miniatura den patio patras pa publico admira. Ademas Santa Rosa y Aruba consciente lo profila nan mes den hardin cual lo ser embeyece pa Santa Rosa pa dia di Betico. Stichting Rancho lo bende dushi pasa boca tipico y coy bebe.

Museo Arkeologico Nacional Aruba (MANA) ta cumpli cu su palabra di ripiti e 'Open House' di henter e compleho, cual na 2008 tabata asina exitoso y a haya hopi peticion pa bolbe hacie. Esaki kiermen cu no solamente e salanan di exposicion lo ta habri pa publico, pero tur oficina, e depot di materialnan arkeologico y laboratorio lo ta habri pa publico mira e arquitectura como tambe e uzo di e edificionan. Asina MANA ta enfoca

cu e edificionan historico unda MANA ta ubica tambe ta forma parti di su coleccion y mester su preservacion.

Museo Historico Aruba lo brinda un dushi ambiente pa su bishitantenan den estilo di un 'mini Bon Bini Festival' cu musica, show folklorico stand cu benta di souvenir y cos dushi tipico. Alabes lo duna e oportunidad pa experiencia Oranjestad riba un otro nivel pa tur cu tin e curashi pa subi e

toren historico di Fort Zoutman. Tambe na Museo Historico bar lo ta bon surti pa esnan cu kier cumpra un dushi cuminda y coy bebe.

Ateliers '89 lo habri cu un exposicion nobo riba Dia di Betico, esta cu trabounan recien, traha aki na Aruba, di artistanan den residencia di Rem van den Bosch y Nicole Bianchet cu trabounan di pintura pa Nicole y fotografia pa Rem. Tambe lo por mira den sala di video e ultimo show di moda yama: MODA. Den e sala grandi por mira e resultado di e exposicion multy disciplinario: Me Myself and I. Tur esaki hunto cu Caha di orgel di Angel Wernet, stand di awa di coco di Betto Faro, obranan di Melissa Richardson y mucho mas ta haci un bishita na Ateliers '89 sumamente atractivo riba Dia di Betico.

UNOCA, situa na Stadionweg 21, tambe ta uni su mes den e celebracion aki y lo habri su salanan di exposicion cu su propio coleccion y esun di Sticusa. Riba e dia liber aki UNOCA lo duna oportunidad na comunidad pa bin cumpra buki. Lo den diferente otro actividad, manera lesamento/contamento di storia, weganen pa mucha y hopi mas.

Bisiña di UNOCA, art studio y galeria Studio O di artista contemporaneo Osaira Muyale tambe lo habri specialmente pa nos dia nacional di Betico pa asina un y tur cu no a haya oportunidad ainda pa bishita e studio, cafe y galeria inspirativo aki.

Un invitacion ta bay na henter pueblo di Aruba pa haci uzo di e oportunidad unico aki y disfruta riba Dia di Betico den un esfera festivo y inspirativo hunto cu famia y amigonan.



AWEMainta****
 e corazon di Aruba
 Nos e-mail:
noticia@awemainta.com
Tel: 583-1400
Fax: 583-1444